

36avel Top Pop Rumantsch – Return d'in passiunà

■ (rtr) Il 36avel Top Pop Rumantsch ans lascha reudir l'anterior chantadur dals Passiunai, Curdin Brugger da Sedrun. Il nov Top Pop Rumantsch porta il titel «Fidonza» e vegn preschentà per l'emprima giada ussa venderdi, ils 07-03-2014 tranter las 08.00 e las 09.00 al Radio Rumantsch.

Avant var 15 onns fascheva Curdin Brugger anc part dals Passiunai, la fitg populara gruppa tuatschina. Cun l'emigraziun da Pascal Gamboni en Engalterra ha però quest chapitel da rock rumantsch prendì ina fin. Curdin s'ha lura deditgà en emprima lingia a famiglia e fatschenta, surpigliond a Sedrun il hotel dals geniturs.

Ma la musica n'ha el betg laschè d'ina vart. Sco fan da la ghitarra acustica ha el perfecziunà sin l'instrument tecnicas da finger-picking ed emprendì da sunar cun accordaziuns avertas, scrivend magari er qua u là ina nova chanzun.

Ina da questas preschenta Curdin Brugger uss sco 36avel Top Pop Rumantsch – in pitschen folksong cun melodia simpla ed in bel refrain tschivlà a la moda da Bobby McFerrin. En quest grà tunan er messadi e titel da la chanzun «Fidonza».

Il bass ha dal reminent sunà Pascal Gamboni, chaschunond uschia ina pitschna reunificaziun dals Passiunai. D'udir exclusivamain sin Radio Rumantsch.



Curdin Brugger.

MAD

Fidonza

*té stos mo vai fidonza
tut vegn bien sche té mo craias
astgas vai buna speranza
sén quella via tga té ais*

*ais engrazievels pér tut quai tga té as
ais cuntians da tut quai tga té sas*

*té stos mo vai pazienzia
tiams vargia, tiams vegn a mussar
fo schi bien fo begi 'ordlunder ina scienzia
libers sas tia via caminar*

*ais engrazievels pér tut quai tga té as
ais cuntians da tut quai tga té sas*

Top Pop Rumantsch è ina seria da produenziun da musica nova ed actuala, lantschada da RTR Radiotelevision Svizra Rumantscha l'onn 2005. Tut ils titels da la serie èn d'udir sin la pagina d'internet da RTR sut: www.rtr.ch/home/dossiers/actual/Top-Pop-Rumantsch.html

Las emprimas 30 chanzuns èn er disponiblas sin ils disc cumpacts Top Pop Rumantsch vol. 1 & 2 ch'èn da retrair tar: RTR, Via Masans 2, 7002 Cuira.